

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 3/2016-imik Inatsisartut tapersiinnissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa, nunarsuarmi sumi inissisimanertik tunngavigalugu nunat tamalaat akornanni naalakkersuinikkut ingerlatsinerup silarsuaani nutaami nunat pineqartut inissisimanerata oqallisigineqarnissaa siunertaralugu ataatsimeersuartitseqqullugit.

(Aallartitat siulittaasuat Lars-Emil Johansen)

Akissuteqaat

(Namminiilivinnermut, Nunanut Allanut Nunalerinermullu Naalakkersuisoq)

1. Siullermeerneqarnera

Aallarniutigalugu Naalakkersuisut sinnerlugit qujaniarpunga aallartitat siulittaasuat Lars Emil Johansen aalajangiiffigisassatut siunnersuuteqarsimammat.

Nunat Avannarliit Killiit Siunnersuisoqatigiiffiata kaammattuutitut aalajangersagaanut Naalakkersuisut isumaqataapput, matumani nunani avannarlerni killerni pingasuusuni naalakkersuisut peqquneqarmata nunarsuarmi naalakkersuinikkut pissutsinut piviusuusunut isummer-toqarnissaa pillugu oqallittoqarnissaa siunertaralugu nunat qanoq isumaqarnersut pillugit ataatsimeersuartoqarnissaanik ingerlatseqqullugit. Massakkut ulluni atukkatsinni nunarsuarput sukkasuumik allanngoriartorfiupiloorfiuvoq.

Assersuutissani arlaqaqisuni ilaatigut taaneqarsinnaapput Amerikap nutaamik præsiðent-ertaarneratigut Amerikamiut nunanut allanut naalakkersuinikkut allanngortuartunik isummersu-lersimanera, Ruslandip Natollu aaqqiagiinnginnerat, Kinap pissaaneqaleraluttuinnarnera, Tuluit Nunaata EU-mit aninera, ajuusaarnaqisumik perulluliornersuit najukkatsinnut qanilliartortutut iinnavissut kiisalu nunanut allanut naalakkersuinikkut isummorsornerit nutaat Nunanut Avannarlernut Killernut pingaaruteqarsinnaasut.

Tamannalu nangiinnarlugu nunarsuatsinni allanngoriartortoqartuarnerata kingunerisussaavaa Nunat Avannarliit Killiit siunissami Atlantikup Avannaani naalakkersuinikkut unammilligassanut nutaanut isummertalersussaanerat.

Islandip aammalu Kalaallit Nunaata Savalimmiullu Kunngeqarfimmut Danmarkimut ilaanerisigut NATO-mut ilaasortaanerat eqqaasagaanni kiisalu nunat taakku pingasuullutik sakkutooqarnatik nunarsuup ilaani tassanerpiaq inissisimammata, soorluttaaq tamanna Nunat Avannarliit Killiit Siunnersuisoqatigiiffiannit eqqaaneqartoq, pingaaruteqarluinnarpoq nunarsuarmi unammilligassanut nunagisatsinnut sunniisinnaasunut ataatsimoorluta suleqatigiinnissarput.

Tamakkulu tunngavigalugit Naalakkersuisut isumaqarput Islandip, Savalimmiut aamma Kalaallit Nunaata siunissami nunarsuarmi pisunut nutaanut piareersartariaqarneq pillugu ataatsimeersuarneq naleqquttuusooq, siunnersuullu akuerineqassappat Naalakkersuisut Savalimmiut Islandillu naalakkersuisui attaviginiarpaat oqaloqatigiissutigalugulu kaammattuut qanoq piviusunngortinneqarsinnaanersoq. Naalakkersuisut tassunga tunngatillugu siunnersuutigivaat Tuluit Nunaat, Norge Canadalu ataatsimeersuarnermi peqataanissamik saqqummiussinissamilluunniit periarfissinneqassasut. Atlantikup avannaani

nunat sanilerisat uagutsitut soqutigisanik arlalinnik nunarsuarmi naalackersuinikkut pissutsinut piviusuusunut soqutigisaqaqatiginissaat naatsorsuutigineqarsinnaapput.

Taamatut isummerluta suleqatigiilluarnissarlu qilanaaralugu Naalackersuisut innersuussutigaat siunnersuut taperserneqassasoq.

Taamatut oqaaseqarlunga aalajangiiffigisassatut siunnersuut Inatsisartunut suliassanngorlugu tunniuppara.